

27/KLIA/2025



AGensi KAWALAN DAN PERLINDUNGAN SEMPADAN MALAYSIA (AKPS)

CUBAAN SELUDUP HIDUPAN LIAR TERANCAM DIGAGALKAN DI KLIA TERMINAL 1

SEPANG, 27 Julai 2025 – Cubaan menyeludup keluar beberapa spesies hidupan liar yang dilindungi telah digagalkan dalam satu operasi bersama melibatkan anggota AKPS KLIA dan Pasukan Keselamatan Penerbangan (AVSEC) di Lapangan Terbang Antarabangsa Kuala Lumpur (KLIA) Terminal 1.

Tindakan pantas pasukan penguat kuasa pada jam lebih kurang 10.00 malam itu berjaya menahan seorang lelaki warganegara Malaysia yang disyaki cuba membawa keluar beberapa ekor haiwan eksotik menggunakan penerbangan MH0198 ke Hyderabad, India.

Bertindak atas maklumat yang diterima, dua anggota AKPS KLIA bersama tiga anggota AVSEC telah menjalankan pemeriksaan lanjut terhadap sebuah bagasi penumpang. Pemeriksaan awal melalui mesin pengimbas mendapati terdapat imej mencurigakan menyerupai hidupan liar di dalam bagasi tersebut.

Suspek lelaki, berumur 38 tahun dan berasal dari Selangor, telah ditahan untuk siasatan lanjut. Hasil pemeriksaan telah menemui:

- Dua (2) ekor disyaki Lotong Kelabu
- Dua (2) ekor disyaki Siamang
- Dua (2) ekor disyaki Armadillo

Kesemua haiwan tersebut disyaki termasuk dalam kategori spesies terancam dan dilindungi di bawah perundangan negara dan antarabangsa.

Kes kini disiasat di bawah Akta Pemuliharaan Hidupan Liar 2010 [Akta 716] dan Akta Perdagangan Antarabangsa Mengenai Spesies Terancam 2008 [Akta 686]. Kesemua haiwan yang dirampas telah dibawa ke Pejabat PERHILITAN untuk tindakan susulan. Anggaran nilai sitaan dianggarkan berjumlah RM73,000.00.

Usaha ini mencerminkan komitmen berterusan pihak berkuasa AKPS dalam membanteras aktiviti penyeludupan hidupan liar yang mengancam biodiversiti negara dan mencemarkan imej Malaysia di peringkat antarabangsa.

Gambar berkaitan:

https://drive.google.com/drive/folders/1ZsSbLekr3dG2vVBqh_gYMZ7ULaUoxUjD?usp=sharing

TAMAT

27 JULAI 2025

UNIT KOMUNIKASI KORPORAT

AGensi KAWALAN DAN PERLINDUNGAN SEMPADAN MALAYSIA (AKPS)

KEMENTERIAN DALAM NEGERI